



Fasnacht 2010

40 Joor Mondlandig

Queen und Supertram die entstöön,
während d'Beatles au scho wider göön.
Syt 15 Joor duet me pfyffe und drumme,
und als Muggedätscher duur Basel bummle.
Schwyzermeschter isch Basel no,
während dr Chapuisait uff d'Wält isch cho.

Me merggt, es isch e zyttli häär,
errinere kaa me sich numme schwäär.
Es isch eidyttig Schnee vo geschter
und presänt hets nur no die elteri Schweschter.
Denn die Zytte, die sin scho lang verbyy.
Vor guet 40 Joor isch das ebbe gsi.

Um uffs eigentliche Ereignis z'spräche z koo,
Brobier euch dodrmit z'errinnere loh:

*Der Mann im Mond, der hat es schwer,
denn man verschont ihn heut nicht mehr.
Er schaut uns bang von oben zu
und fragt: Wie lang hab ich noch Ruh?*

Wo dört oobe dä Joggi sich das froggt,
isch me bi uns unde schomol zämme ghoggt,
het s Projäggt Mondlandig in Aagriff gnoo
und d'Apollo 11 in richtig Mond starte loo.

Am 21 Juli, am 4 voo 3 am Moorge,
het dr Neil Armstrong ganz ooni Sorge,
si Fuess uf e Mond gsetzt, als erschte Mensch,
mit em Spruch wo au du sicher kennsch:

*Dasch e glai Schrittlü fүүr mii,
doch no e greesers fүүr d'Menschheit.*

Alli wo sin do unde gstande,
und nid als erschts hän uf em Mond könne lande,
sin hässig gsi und vor Wuet am brenne
wänn s de Amis überhaupt nid genne.
Hän grad Fotianalysene gstartet
und yyfrig uff d'Ergäbnis gwartet.

Hän denn glii drufaabe in d'Wält posuunt
alli heige umesunscht nur gstuunt
Denn die Landig, heig gar nie stattgfunde
alles sig gfilmt worde, do, uff dr Ärde unde.
Vor Kulisse und Kamera im Studio dinne
Hän si d'Bewunderig vo dr Menschheit welle gwinne

Drno het's e riise Chaos gää
Doch mir Schwyzer lön s uns nid lo nää
Hän dä ganzi Zirkus nid welle begriesse,
sondern hän lieber welle e Määrtlugge schliesse.

Mir hän e zyloos Wunder greiiert, wo e jeede kennt,
wo me Rakete oder Apolloglace nennt.
Ob jung ob alt, ob Frau ob Maa,
e jede muess die Glace haa.

Und jede Summer, bis hite no,
wird die Glace uss em Kiehler gno.
Es erfrischt e Jede an heisse Daage
Und mir Schwyzer, derfe d'Loorbeere draage.

**Fascht eso häll wie bi de Sterne lychtets am
Mäntig znacht bis am Mittwuch demoorge uff em
Minschterblatz.
D Wäägen und d Requisit kaasch uff em
Kasäärenareal go aaluege.**